

Naalakkersuisunut apeqqut:

Naalakkersuisunut apeqqut: Naalakkersuisut qanoq suliniuteqarpat qalerallinnik mikivallaartunik qalluisarneq pinaveersimatinniarlugu ? Aammalu qanoq suliniuteqassa-maarpat?

(Inatsisartunut ilaasorta, Jakob Skade, Kattusseqatigiit Partiiat)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Augustimi sinerissap qanittuani qalerallinnik aqutsiveqarfinnut Upernavimmut, Uummannamut Ilulissanullu angalaninni qalerallinniarnerup nungusaataannngitsumik ingerlanneqarnissaa aalisartut akornanni annertuumik tapersorsorneqarpoq. Qassusersorluni qalerallinniarnerup killilerneqarnissaa sumiiffiillu ilaanni qaleraleqassuseq illersorniarlugu qassutit inerteqqutaavinnissaat aalisartuniit kissaatigineqarpoq. Aalisarnermut, Piniarnermut Nunalerinermullu Naalakkersuisoqarfiup nalunaarutigini kuuaa, 2009-mi oktobarip aallartinneraniit ukiup sinnerani qalerallinnut qassutit atorneqarnissaa inerteqqutaalersoq.

Qaasuitsup Kommuniani oktobarimi isumasioqatigiinnermi aalisartut uangalu ilaatigut siunissami qalerallinniarnermi qanoq aqutsisoqarsinnaanersoq oqallisigaarput, tassanilu aamma aalisakkat mikisut ilanngunneqarput.

Qalerallinniarnerup naleqqussarnissaa ilaatigut pisariaqarpoq, tamannalu piffissaq sivikitsoq eqqarsaatigalugu annernartussaavoq, kisiannili sumiiffiit ilaanni aalisarnermut akuersissutit amerlassusaasa aalisarsinnaassutsillu killilerneqarnissaa pisariaqarpoq. Aammattaaq isumaqarpunga eqqaasarnikkut pisuussutit annertuut maangaannartinneqartarnerat pinngitsoorniarlugu suliniuteqartariaqartugut, pisuussutillu annertunerpaamik atorneqarluarnissaa suliniutisariaqarlutigu.

Aalisarnermut, Piniarnermut Nunalerinermullu Naalakkersuisoqarfik aammattaaq suleqatigiissitaliorpoq, tassanilu siunertaavoq sinerissap qanittuani qalerallinniarnermik aqutsinermi pilersaarummik siunnersuusiornissaaq, suleqatigiissitaliarlu inuussutissarsiortunit sinniisulerlugu ilaneqassaaq. Qalerallit minnerpaaffissaasa maannakkut 42 centimeteriusup 45 centimeterinngortinneqarnissaanut periarfissat suleqatigiissitaliap ilaatigut misissussavaa. Qalerallit mikisut pisarineqarsinnaanerat pinngitsoortinniarlugu suliniut taanna pingaaruteqassaaq.

Avataasiorluni aalisarnermi ristit atorneqarsinnaanerinut periarfissap misissorneqarnissaa apeqquteqaammi taaneqartoq eqqarsaatigalugu, ilisimatitsissutigineqarsinnaavoq taamanikkut Naalakkersuisuusut kissaatiginikuugaat taamatut misissuinissap aallartinneqannginnerani Kalaallit Nunaanni aalisarnermi qulliunerusumik sinaakkutit nutarterneqarnissaa utaqqimaarneqassasoq. Aalisarneq pillugu inatsisip akuersissutigineqarnissaa kinguartinneqarmat, misissuinissaaq aamma kinguartinneqarpoq.

Oqaatigineqassaaq UKA2007-imi aalajangiiffigisassatut siunnersuut Aalisarnermut, Piniarnermut Nunalerinermullu Ataatsimiititaliap isumaliutersuummik saqqummiussiffigisaa ”Sinerissap avataani qalerallinniarnermi qalerallit mikivallaat qallorneqartarnerisa sapinngisamik pinaveersimatinniarlugu, Naalakkersuisut malittarisassanik sukatereqqullugit suliniuteqarnissaannik peqquneqarnissaa pillugu, inatsisartut aalajangiiffigisassaattut siunnersuut”, itigartitsisutigineqarnikuusoq. Kisiannili qalerallit nungusaataannngitsumik atorluarneqarnissaa pilerseqqinniarlugu Naalakkersuisuni suliaqarpugut, suleqatit suliamut attuumassuteqartut, taassuma ataani Qaasuitsup Kommunian aamma KNAPK kiisalu tunisassiortut, suleqatiga-

lugit assigiinngitsunik suliniuteqarnikkut. Naggasiullugu oqaatigissavara aqutsiveqarfimmi Upernavimmi qaleraleqassutisimik misissuivinnissaq Naalakkersuisut kissaatigaat, tassa tassa-
ni biologit suli siunnersuuteqarnikuunngimmata.